

PLUS CACHET APTEEK

U Plus Aptek
TOMSTRAAT 92
Tel. 4201
 Groot genoeg om u te dien, klein genoeg om u te ken

die **WAPAD** IN U LIG SIEN ONS DIE LIG

ASPU

AMPTELIKE STUDENTEKOERANT VAN DIE P.U. vir C.H.O.

JAARGANG XXXIV NOMMER 4 23 FEBRUARIE 1979

TOPS

Uitsig Deurloop
 Tel. 21112

VIR: Rekenaars
 Witjasse
 Dissekteerstelle

 Skoonheidsmiddels

 Geskenke



Plakkers het sedert April - Mei 1975 uit verskeie oorde op Kruispad toegesak en die getalle het veral drasties gegroei na die opruiming van Modderdam, Werkgenot en Unibel. So is 'n tydelike skerm opgerig tot dat die plakkershut voltooi is. - (Foto - Die Burger)

PU en OKP Koördineer

'n Paar Pote-eerstejaars draf tans op die PU klas nadat 'n ooreenkoms in 1978 tussen die Administrateur van Transvaal en die Raad van die PU vir CHO onderteken is waarvolgens die PU en OKP onderneem om gesamentlik studente op te lei.

In die verlede was die Universiteit en die OKP volgens wet gemagtig om afsonderlik onderwysstudente op te lei. Die betrokke wet bepaal egter ook dat 'n universiteit en 'n kollege vanaf 'n datum, deur die Minister van Nasionale Opvoeding aangekondig, primêre en pre-primêre onderwysers in noue samewerking met mekaar kan oplei.

Op 3 Junie 1978 is 'n ooreenkoms tussen die Administrateur van Transvaal en die Raad van PU vir CHO onderteken waarvolgens die PU en OKP onderneem om gesamentlik, ná implementering van die beperkinge van die ooreenkoms onderwysstudente op te lei. Besonderhede oor die spesifieke aard van die ooreenkoms

moet nog bepaal word en sal waarskynlik binne die volgende jaar gefinaliseer word.

Totdat hierdie sisteem in werking tree het die OKP die reg om gegradueerde (mits die grade deur die PU uitgereik word) en nie-gegradueerde onderwysers vir die primêre en pre-primêre skool op te lei.

Die PU vir CHO en die direkteur van Onderwys van Transvaal het egter ooreengekom dat die graadstudente wat primêre onderwysers wil word binne redelike perke gehou sal word en dat hulle getal nie vyftig per jaar sal oorskry nie. Vandaar die ongeveer dertig studente van die POK wat gedurende 1979 aan die PU as graadstudente geregistreer is. Hulle word suiwer as primêre onderwysers opgelei en ontvang hulle graadopleiding aan die PU vir CHO en hulle professionele opleiding aan die OKP.

Hierdie reëlings het slegs betrekking op Primêre onderwysers en opleiding van sekondêre onderwysers is nie hier ter sprake nie.

ASBeeld verbeeld Kruispad

Die plakkersprobleem by Kruispad word uitvoerig in die eerste uitgawe van die ASBeeld, 'n ASB-studiestuk wat diepte-artikels bevat, bespreek.

Die redaksie van hierdie studiestuk hoop om met hierdie stuk die ontstaan en verloop van die gebeure by Kruispad in perspektief te plaas. Hulle trek sekere riglyne voortspruitend hieruit, hoewel dit vir die ASB vasstaan dat 'n eenvoudige oplossing nie moontlik is nie. Kruispad is op hierdie stadium die enigste noemenswaardige swart plakkerskamp in die Wes-Kaap. Die kamp is ver van die tuislande geleë en binne die voorkeur arbeidsterrein van wit- en bruinmense.

In die studiestuk word melding van die unieke aard van die plakkersdorp gemaak. Gedurende 1977 het Kruispad die vorm van 'n permanente woonbuurt met 'n eie karakter aangeneem.

Plakkerstoestande soos dié by Kruispad word veroorsaak deur 'n toestroming na stedelike werksgebiede en die voortdurende behuisingstekort wat daarop volg.

Eksemplare van hierdie studiestuk kan by die SSR-kantoor aangevra word.



KYK NET SO 'N GROOT KLOMP TJANKBALIES!

Vaalriviereerstejaars skakel in

Die eerstejaars van Rivierpuk het hierdie jaar vir die eerste maal 'n bietjie oriëntering gesmaak.

Op die kenmekeer is al die ou dames en here se name gou geken en met die sing-songs het dit voor die wind gegaan. Selfs die ou menere se motors is 'n dag deeglik gewas en gepoleer.

Die "borrels en barbers" soos hulle genoem is, is ook deur die studenteraad van die hoof-PU toegesprek oor

tradisie en die christelike grondslag van die PU.

Dit kan tereg gesê word dat hulle uitgevind het dat eerstejaar nie alles maanskyn en rose is nie. Hulle het ook dadelik by die gees van die universiteit ingeval en hulle het baie mooi saamgewerk en daardeur dit ook vir hulself makliker gemaak.

Langbroeke by damesbaadjies toegelaat

'n Gemakliker baadjie mode vir dames is aanvaar, deur dat dames nou langbroeke saam met PUK-baadjes mag dra.

Op 'n SSR-vergadering, gehou op 5 Oktober 1978, is die volgende mosie ingedien en aanvaar: Dat die bestaande reël dat dames nie PUK-baadjes saam met 'n langbroek mag dra nie, afgeskaf word op grond daarvan dat hierdie reël verouderd en inkonsekwent is.

Volgens 'n meningsopname oor die aangeleentheid is onder andere gevind dat Mej. Marietjie van Wyk, primaria van Kasteel, gesê het die broeke sal nie by die baadjie pas nie.

Mej. Analeen van Wyk, primaria van Vergeet-my-nie het gesê: "Ek hou nie daarvan nie." Mej. Mariëtta van der Walt het gevra hoekom almal alles volgens

'n eenparig aanvaarde mosie moet doen. "Dames moet die vryheid hê om self te besluit." Volgens mej. Annemarie Jacobs (van SSR-faam) kan dit pragtig lyk, veral by 'n ligte langbroek.

Karien Geyer, primaria van Karlien, het gesê dat dit swak lyk by 'n langbroek. Mnr. M.E. Bisset, 'n vierdejaar student, beskryf sy gevoel met: "Onsmaakvol!" Daar is ook studente wat ten gunste is van die nuwe drag. Mnr. G. Rossouw en A. Visser meen dis goed solank dit net netjies is. Mej. Eloise Jacobz sal die kleurbaadjie nou as gevolg van die gemakliker mode eerder koop.

DISAFFILIASIE NOG MOONTLIK

Elke Pukstudent kan nog binne die volgende paar dae self besluit of hy lid van die Afrikaanse Studentebond wil wees en of hy wil disaffilieer.

Tot in Julie 1978 het elke Pukstudent outomaties by die ASB geaffilieer op grond van die Studenteraad se affiliasie. Aangesien daar baie ontevredenheid hieromtrent ontstaan het, is daar op die kongres van 1978 besluit dat studente op 'n ander wyse by die ASB moet affilieer.

Elke student wat nie vóór

28 Februarie 1979 te kenne gee dat hy hom van die ASB distansieer nie, sal dan as lid van die ASB beskou word. Dit is 'n stelsel van stilswyende affiliasie of uitdruklike disaffiliasie.

Pukke wat hulle dus van die ASB wil distansieer, kan hulle name voor 28 Februarie by die SSR-kantoor opgee.

REKTOR VERGUN BIERTUIN

Die Rektor het vanjaar die Karnavalkomitee vergun om die biertuin twee aande tot die beskikking van die studente te stel.

Die lid van Karnavalkomitee wat gemoeid is met die biertuin, Stefan Pretorius, moet na Karnaval 'n verslag aan die Rektor voorleë. Hy doen 'n beroep op alle studente om saam te werk en te verseker dat geen onreëlmatighede plaasvind nie.

Die sukses van die biertuin en die gedrag van die Pukke sal bepaal of daar in die toekomstige weer toestemming gegee sal word vir die hou van 'n biertuin.

Die biertuin sal Donderdagaand, 1 Maart, van 19h30 tot 20h30 oop wees, en die Saterdagdagaand van 19h00 tot 21h00. Mens, sowel as dames sal welkom wees om van die dienste gebruik te maak.

VERDIEN GELD MET GESELS

Geselselrige plaatsakstudente kan geld verdien deur vir Die Wapad advertensies te werf! 'n Advertisseerwerwer ontvang tien persent van die bedrag wat die adverteerder betaal. Kyk op bladsy vier vir meer besonderhede oor beskikbare reklame poste.

Zij hebben gezegd

Die volgende sake het op 'n SSR-vergadering op Donderdag, 15 Februarie ter sprake gekom:

- Daar word op die oomblik onderhandel met Fort Hare, Durban, Universiteit van Pietermaritzburg, UCT en Wes-Duitsland in verband met uitruilstudente.
- Twee Australiese studente is uitgenooi na vanjaar se Karnaval.
- Die belofde Grommel-trommel is in aanbou en sal die studente hopelik gou die

geleentheid gun om griewe, aanbevelings en inligting aan die SSR oor te dra.

- Die moontlikheid van 'n dak oor die parkeerterrein tussen Over-de-voor en Heide word ondersoek.

● Die Brosboek sal in April gereed wees, sodat Broek-samen einde April/begin Mei deur die eerstejaars afgelê sal kan word.

● Studente word daarop gewys dat die Graffiti-borde in die duikweg nie vir die opklak van plakkate bedoel is nie. Daar word aandag gegee aan die oprigting van meer kennisgewingborde op die kampus.

● Skakelingsgeleenthede is gereël met die Studente-rade van Tuks (28 Februarie), Maties (9 Maart), Kovsies (10 Maart) en Wits (23 Maart).

● Die Studenteraadskonferensie sal op 10 Maart aangebied word.

● UPE het in sy studente-koerant verskoning gemaak in verband met foutiewe beriggewing oor die Pukkies. Hulle koshuishouding is ook verhoog: R800 vir 'n enkel- en R740 vir 'n dubbelkamer.

● Die moontlikheid bestaan dat daar 'n kitaarvereniging onder die Kultuurraad tot stand sal kom.

● Daar is sprake van 'n welwillendheidskenning van R500 deur Bult Garage aan die SSR.

● 'n Volledige evaluering van die Kampusfokuskamp sal later ingedien word. Volgens die evalueringstabelle blyk dit egter 'n sukses te wees.

● Sparno het onderneem om van die paar oorblywende ou kleurbadjes pette te laat maak.

● 'n Kommissie bestaande uit meneer Adriaan van der Walt, meneer Breed en meneer Hatting is aangestel met die opdrag om op 22 Februarie 'n beplanning in te dien in verband met 'n fondsinzameling vir 'n bydrae tot die kunsbaan van die WTAU.

● In opdrag van die Rektor sal die SSR klagtes in verband met danse wat deur koshuise gereël word, bloot na die betrokke huisvader verwys vir aandag.

● Meneer Piet Joubert gee daaraan aandag dat eerstejaarmans nie hulle "skiete" vir die ontheffingsdinee gaan haal het nie.

● 'n Studiestuk oor die struktuur van die Akademie Raad sal op 1 Maart beskikbaar gestel word.

● 'n Aanbeveling deur Kultuurraad lui dat daar op Bier en Braaie toegesien moet word dat genoeg koeldrank beskikbaar is, en aandag gegee moet word aan kontrole oor drankgebruik.

● Meneer Breed is op die oomblik besig met die beplanning van 'n fiksheidsroete op die Fanie du Toit, asook met die bekendstelling van ontspanningsgimnastiek.

● Die PU sal 'n kampioensbraaivleisspan borg vir die Wynfees in Montagu. 'n Bus vir 60 persone is voorlopig vir die geleentheid gereël.

● 'n Ontspanningsgids sal so gou moontlik beskikbaar gestel word.

● Prof. Scholtz, voorsitter van die beheerraad van die Studenteadviesburo, het laat weet dat hy graag met die

negatiewe, geïrriteerde agitators in die studentelewe wil kontak maak.

Die volgende voorstelle is op die vergadering aanvaar:

● Dat die SSR dit duidelik stel dat hulle dit, as deel van 'n Raadsvoorsitter se pligte beskou om Kampusfokus by te woon.

● Dat advertensies oormout, wyn en sigarette in pu-

blikasies geplaas mag word mits dit matig en welvoeglik is.

● Dat die SSR minstens een derde van die vervoerkoste van die PU afgevaardigdes na die Nasionale Studenteredakteurskonferensie in Stellenbosch sal finansier op voorwaarde dat die nodige inligting aan die Finansiele komitee gegee word

en dat dit tot hulle bevrediging is.

● Dat die SSR van die PU vir CHO ingevolge die grondwet van die ASB by die ASB affilieer en namens die PU-student wat nie tekenne gegee het dat hulle wil disaffilieer nie.

● Dat die oorkoepelende sportliga van Pat's-Harold kan voortgaan.

STUDENTESUBSIDIE BEVRAAGTEKEN

Die tema van 'n besprekingsaand wat deur die Akademie Raad beplan word, is: „Is die staatsubsidie vir studente nog geregverdig onder die huidige ekonomiese toestande?”

Sprekers by hierdie geleentheid sal doktor D.S. Henderson, Vise-Kanselier van Rhodes, doktor H.S. Steyn, Direkteur van Universiteitsaangeleenthede by die Departement van Nasionale Opvoeding en professor S.J. du Plessis, Vise-Rektor van die PU, wees.

Daar sal gepoog word om die standpunte van die stu-

denterade en al die studente van ander universiteite te verkry om ook as besprekingspunte te dien.

Die geleentheid sal op 15 Maart om 19h30 in die Totiusaal plaasvind. Alle studente, matrikulante en ouers in Potchefstroom is uitgenooi om die geleentheid by te woon.

TUISLANDBELEID UITGEDIEN?

In die onlangse Politiese Perspektief, wat handel oor 'n vergadering van swart leiers op 11 Februarie 1979, tree die vraag of die tuislandbeleid uitgedien is duidelik na vore.

Dit blyk dat ander swart leiers 'n vriendeliker houding openbaar teen die Inkatha van Hoofman Gatsha Buthelezi.

Dit kan beteken dat die Swart leiers 'n uniale politieke sisteem vir Suid-Afrika steun. Die vergadering het ook die tuislandoplossing verwerp.

Politiese Perspektief steun hierdie standpunt.

Politiese Perspektief is 'n bate vir enige persoon wat belangstel in politiek omdat dit aandag gee aan gebeure wat op die oog af onbelangrik lyk, maar tog die rigtingwysers is vir die toekomstige politieke verwikkelinge.

SÊRKOMPETISIE IS HIER!

Die Sêrkompetiese belofte om een van vanjaar se Karnavalhoogtepunte te wees. Daar sal onder andere op Studentevaria opgetree word.

Die Gemengde Sêr vind Vrydagaand, 24 Februarie, plaas. Die drie beste groepe sal Maandagaand 26 Februarie tydens Studentevaria die geleentheid kry om op te tree. By hierdie geleentheid sal die uitslag ook bekendgemaak word. Enkelsêr sal Saterdag, 24 Februarie vanaf 08h30 tot ongeveer 17h00 plaasvind.

Al die kompetisies vind in die Totiusaal plaas en 'n minimum van tien koshuishouers moet deelneem. Geen groep mag korter as vyf minute of langer as 15 minute

optree nie. Minstens een derde van die tyd of liedjies moet in Afrikaans wees. Geen elektriese instrumente word toegelaat nie. Slegs instrumente wat maklik gedra kan word, mag gebruik word. Net twee soorte instrumente mag per liedjie gebruik word, maar dit maak nie saak hoeveel van 'n soort daar is nie.

Alle navrae in verband met die Sêrkompetieses kan aan Frikkie van Niekerk, ondervoorsitter van Kultuurraad, gerig word.

POTCH INRY

FEB. - MAART

26 Feb. - 27 Feb. AN UNMARRIED WOMAN - MIA FARROW.

2 - 3 Maart AN UNMARRIED WOMAN - MIA FARROW 2de vertoning

28 Feb. - 3 Maart THE DRIVER - RYAN O'NEAL

5 - 8 Maart JAWS 2 - ROY SCHNEIDER

9 - 10 Maart 1ste vertoning JAWS 2 - ROY SCHNEIDER

9 - 10 Maart 2de vertoning FIRST LOVE - SUSAN DAY

SGD NEEM LEIDING

Die Studentegemeenskapsdiens (SGD) gaan hulle werk vanuit 'n nuwe uitgangspunt aanpak, naamlik om mense te help om hulself te help.

In Suid-Afrika is dit 'n nuwe uitgangspunt. Voorheen is daar net in behoeftes voorsien maar daar is nie aandag gegee aan voorligting vir behoeftiges om persoonlike behoeftes te oorkom nie, wat uiteindelik sal neer kom op daadwerklike diens.

Hierdie is 'n belangrike veld vir studente om hul kennis oor te dra en leiding te gee aan behoeftiges. As eie probleme opgelos is kan hierdie mense weer andere met dieselfde probleme help.

Die SGD se grondwet is van só 'n aard dat studente-verenigings wel finansiële hulp en advies van die SGD ontvang, maar dat geen opdragte aan die verenigings gegee kan word nie. Daar is op so 'n stelsel besluit om te voorkom dat verenigingslewe tot niet gaan soos wat op ander kampusse gebeur het ná die instelling van soortgelyke projekte.

Die besuursraad sal uit sewe of agt studente, wat deur die SSR genomineer is, en ses Universiteitspersoneelle bestaan. Dit sal hoofsaaklik vier funksies verrig, naamlik finansiële bestuur; die samestelling van 'n werkskomitee wat as koördinerende liggaam sal dien om te verseker dat projekte mekaar nie oorvleuel nie; skakeling met die karnaval-komitee en ook die aanstelling van 'n direkteur wat die daaglikse administrasie sal verrig. Die direkteur sal geen stemreg op die bestuursraad hê nie, maar sal wel bestuursraadvergaderings bywoon.

'n Aksiekomitee is gestig wat tydelik die funksie van die direkteur sal oorneem totdat 'n direkteur aangestel word. Die eerste plig sal wees om behoeftes uit te stip en om met verenigings wat alreeds gemeenskapsdienste lewer, te skakel.

Alhoewel die SGD beoog om dienste aan alle gemeenskappe in en om Potchefstroom te lewer is daar 'n aanbod van finansiële hulp van SAMPI ontvang vir projekte soos die oprig van skole en gemeenskapsale en die verbetering van behuising en sportgeriewe vir die swart gemeenskappe op die plaasgebiede om Potchefstroom.

Projekte en beplande projekte in Ikageng en Promosa tree duidelik op die voorgrond vanweë die groot behoeftes in hierdie gemene skappe.

Die SGD beoog om in

April 'n skakeltoer deur die land te reël. Op hierdie toer sal soortgelyke projekte op ander kampusse bestudeer word en sal studente vir gemeenskapsdiens opgelei word.

P.A.S.U. WOEKER

Die Potchefstroomse Aptekersstudentevereniging is vanjaar verantwoordelik vir die organisasie van die 26ste Algemene Jaarvergadering van die Suid-Afrikaanse Aptekerstudente Federasie.

Die Vergadering sal vanaf 7-10 Julie in Pretoria plaasvind en aan verteenwoordigers van die 9 takke van die SAASF die geleentheid gee om sake rakende hulle vakgebied en professie te bespreek. Die studente sal ook praktiese opleiding ontvang in verband met groothandel, vervaardiging en bemerking tydens 'n Simposium wat gedurende die week sal plaasvind. Daar sal ook gepoog word om die tema van die Gesondheidsjaar by die agenda te integreer en die Minister van Gesondheid sal genader word om as gaspreker by die Banketete op te tree.

Hoewel die reëlingskomitee borgskap van verskeie maatskappye ontvang, sal die studente nog verantwoordelik wees om 'n groot bedrag

geld in te samel. Vir hierdie doel beplan hulle onder meer 'n lenteloop en verskeie ander aksies.

In samewerking met die SGD verrig die PASV ook nog belangrike gemeenskapsdiens. Daar word tans mense opgelei vir die behartiging van bloedoortappingsdienste. Vyf maal per week word klinieke in Promosa en Ikageng gehou waar ongeskeduleerde medisyne teen 20c per voorskrif aan swartes voorsien word. Die moontlikheid bestaan ook dat SAMPI 'n mobiele apteek gaan skenk wat die omliggende plase en plote sal bedien.

Daar word ook beplan vir die aanbieding van die jaarlikse Gesondheidsweek waartydens medici siektes van aktuele belang sal bespreek.

Rektor "betree salusa-jare"

Prof. Tjaart van der Walt het sy verjaarsdag op 14 en 15 Februarie gevier. Woensdagaand het hy en mev. van der Walt die SR ontvang om sy "oujaarsaand" te vier.

Prof. Van der Walt het al die dekane, dosente en huisvaders aan die PU genooi om hom Donderdag tussen 16h00 en 24h00 aan huis te kom gelukwens.

Hy het Die Wapad gevra om sy hartlike dank aan al

die persone wat blomme en kaartjies met gelukwensinge gestuur het en aan al die sêrgroepe wat sy verjaarsdag ingelui het, oor te dra.

Prof. Tjaart, een van die jongste rektore in die land, sê hy betree nou sy Salusa-jare.

UITBREIDING VAN DIE VAALRIVIERTAK VAN PU VIR CHO

In sy openingstoespraak aan ouers en eerstejaarstudente op Dinsdag 30 Januarie het prof. Tom van Dyk, die hoof van die Vaalriviertak van die PU vir CHO 'n paar feite aan die lig gebring.

KORPS VERNUWE

Korps het op 'n splinternuwe stelsel van ledewerwing tydens 'n Korpsraadsvergadering op Donderdag, 15 Februarie, besluit.

Die stelsel sal tydens die Korpsuitstalling van 5 tot 7

Maart geïmplimenteer word. Dit bied aan almal, wat hulle een voel met Korps, die geleentheid om betrek te word.

Deur ledegeld aan een onderliggaam te betaal kan 'n student outomaties aan alle Korpsaksies deelneem. Dit kom daarop neer dat daar net een keer ledegeld van R2,00 betaal word - R1,00 vir die betrokke onderliggaam en R1,00 vir Korpsraad.

Met die fondse sal die verskillende aksies meer professioneel aangebied kan word. Korps sal gevolglik meer aan sy doel kan beantwoord, naamlik om 'n reformatoriese Christelike wêreld- en lewensbeskouing op en buite die kampus uit te bou. Minstens een interessante uitstappie sal uitsluitlik vir Korpslede aangebied word.

Die kwessie van oorvleueling met kerkjeugverenigings is ook geopper. Volgens meneer Piet Odendaal, Voorsitter, hou die kerkjeugverenigings hulle hoofsaaklik besig met basiese geloofsleerstellinge en "kerkwerk" (byvoorbeeld Bybelstudie). Aan die ander kant werk Korps besinnend oor die breë kultuurlêre en neem hulle aan dat die lede reeds onderleg is met bogenoemde kennis. Korps en die verskillende kerkjeugverenigings staan dus aanvullend en wedersyds bevruggend tot mekaar.

Prof. van Dyk het dit beklemtoon dat die Vaalriviertak tot stand gekom het uit die behoefte vir 'n eie residentiële universiteit. Die hoop dat dit 'n sukses sou wees is nie beskaam nie. Die universiteit het so uitgebrei dat die eerste groep voltydse studente (50) in 1977 ingeskryf het. Verlede jaar ('78) het 100 eerstejaars ingeskryf en 'n hele paar studente het van ander universiteite oorgekom na die tak. Die presiese getal van hierdie jaar se studente was ten tye van ter perse gaan nog nie gefinaliseer nie. Die personeel het verlede jaar bestaan uit sewe administratiewe personeellede en 28 akademiese personeellede - 'n totaal van 35. Hierdie jaar is die akademiese personeel 45 en die administratiewe personeel 12, 'n totaal van 57.

Die universiteit het nie slegs in getalle gegroei nie, maar ook op ander gebiede. Die opdrag is klaar gegee vir die omheining van ons kampusgrond langs die Vaalrivier. Die moontlikheid bestaan ook dat sport- en ander basiese fasiliteite daar ontwikkel kan word.

Ook die diens aan die gemeenskap is uitgebrei. Daar word op die oomblik die moontlikheid van 'n eie adviesraad ondersoek wat leiers van die gemeenskap sal insluit.

In 1979 sal daar ook 'n voorligtingsdiens wees vir studente en skoolleerlinge in die Vaalriedhoek.

Prof. Van Dyk het ook beklemtoon dat 'n suksesvolle student ten minste 40 uur per week aan studie moet wy. Hulle moet egter ook aan ander universitêre aangeleenthede deelneem om sodoende 'n goeie gees tot stand te bring.

SBV BEPLAN SO VIR 1979 ...

Die uitsluitlike doel van die SBV (Studente Biblioteekvereniging) is om 'n samehorigheidsgevoel onder die biblioteekstudente te kweek; om die beeld van die biblioteek te verbeter, te skakel met die beroepsvereniging (SABV) en inter-universitêre skakeling te bevorder.

Op versoek van die SBV is 'n skakeldosent deur die Departement Biblioteek- en Inligtingkunde aangewys. Mnr. Malherbe, skakeldosent vir 1979, behartig die belange van die studente op personeelvergaderings en reël ook toere na ander biblioteke.

Belowende studente sal boekpryse ontvang. Die studente in hul finale jaar ontvang geldpryse. Die studente wat tagtig persent van die SBV bygewoon het, geniet voorkeur by die uitdeling van pryse.

Die SBV geniet ook die stem van die Suid-Afrikaanse Biblioteekvereniging. Die

bekendstellingsfunksie van die SBV sal 'n braaivleis wees, wat in samewerking met die SABV aangebied word. Die voorsitter van die SABV, Prof. A.J. Viljoen, is hoogleraar in Biblioteek- en Inligtingkunde aan die PU vir CHO.

Daar bestaan goeie verhoudings tussen die SBV's van die PU vir CHO en die UOVS. Tydens die jaarlikse intervarsity word 'n vasvrankompetisie tussen die twee universiteite se Biblioteekkundestudente gehou. 'n Goed geoefende SBV-span sien met groot verwagting uit na die komende "Inter-Dink".



Tydens die massasleep is almal na die dorp se "Sopkombuis". Hier staan almal net voor hulle vertrek.

NACH HAUSE

Die bekendstellingsaand van die Duitse vereniging is op 14 Februarie 1979 gehou. Die eerste- en derdejaars was goed verteenwoordig, maar daar was geen tweedejaars by die vergadering teenwoordig nie.

Edith Ahrens, 'n Suidwester, is as verteenwoordigster van die eerstejaars gekies. Volgens haar is daar nog heelwat Suidwesterse wat in die Duitse Vereniging sal belangstel.

Die ledegeld van die Vereniging sal vanjaar drie rand beloop. Die "Scala" sal maandeliks uit Duitsland hierheen gestuur word en sal onder lede sirkuleer. Byeenkomste van die vereniging sal Woensdagaande van 19h30 tot 20h00 in Vergeet-my-nie plaasvind. Verskeie Duitse liedjies sal geleer word. Die Duitse Vereniging beoog ook om 'n besoek aan die Duitse gemeenskappe in Natal of op Kroondal te bring.

Deur mej. Roetz, 'n bestuurslid van die ADK en ook 'n aktiewe meehelpster aan die Duitse Vereniging van die PU vir CHO, is dit moontlik om stewige kontak met die ADK op te bou.

Die doelstelling van die Afrikaans-Duitse Kultuurunie is die versterking- en bevordering van kulturele betrekkinge tussen Suid-Afrika en Duitsland deur die wedersydse verspreiding van kennis aangaande kultuur, letterkunde, kuns en wetenskap.

Die Afrikaans-Duitse Kultuurunie in Suid-Afrika en die "Deutsch-Süd-afrikanische Gesellschaft" in Duitsland beoog: persoonlike kontak op hoë vlak in Suid-Afrika en Duits-

land; lesings, filmvertonings, musikale en ander aanbiedinge; Suid-Afrikaanse tentoonstellings in Duitsland; die ontvangs van Kultuurverdrag- en ander besoekers uit Duitsland; uitruilstudente; uitbreiding van penvriendskappe tussen hoërskoolleerlinge, studente en volwassenes; inburgering

van immigrante; voorsiening van Suid-Afrikaanse literatuur aan biblioteke in Duitsland; en die bestryding van onjuiste beriggewing oor Suid-Afrika in oorsese koerante, tydskrifte en beeldradioprogramme.

Belangstellendes kan met Rina Papenfus in Karlien skakel.

LIBER FACTUS BEKEND GESTEL

Liber Factus het Woensdagaand, 14 Februarie 1979, 'n bekendstellingsaand gehou. By die geleentheid het die rektor, prof. Tjaart van der Walt, kortliks die doelstellings van die vereniging aangestip.

Liber Factus beteken: „vrymaak van iets wat bindend is". Die doelstellings behels die skepping van die regte klimaat vir drankgebruik - die gebruik en nie misbruik daarvan nie.

Prof. Van der Walt het daarop gewys dat die misbruik van dwelmiddels op die PU byna geen probleem verskaf nie. Verder het hy gesê dat die Pukke beslis nie meer drink as ander studente nie. Hy het gesê dat die misbruik van drank deur drie redes veroorsaak word: Studente wat onkundig oor die

gebruik van drank, op die PU aankom, die gebrek aan vermaak op Potchefstroom en die feit dat drinkers as helde voorgelou word deur hulle maats.

Die vereniging beplan heelwat uitstappies. Onder andere sal hulle met verskeie alkoholiste gaan gesels en by rehabilitasiesentrums besoek aflê.

Indien u belangstel om by die vereniging aan te sluit, is u welkom om die voorsitter, Wendri Oosthuizen, by telefoon 22119 te skakel.



Prof. Tjaart gesels met lede van Liber Factus tydens 'n bekendstellingsaksie

Oom Jannie tree uit

Mnr. C.J.H. Schutte, registrateur van finansies aan die PU, het op 9 Februarie uit die diens getree weens gesondheidsredes.

Mnr. Schutte was registrateur sedert 1968. Hy het sy B.Comm-graad in 1943 aan die PU verwerf. Hy het daarna vir sewe jaar in Johannesburg by 'n finansiële instansie gewerk, waar hy ook rekenmeester was.

In 1950 het hy organiseerder aan die PU geword. Later was hy ook studentadviseur (in die dae toe daar nog maar agthonderd studente was).

Oom Jannie, soos hy ook bekend staan as huisvader van Wag-'n-Bietjie, sal nog huisvader van dié koshuis wees tot Junie 1980. Hy is reeds sedert die ontstaan van die koshuis in 1973 huisvader aldaar.

die WAPAD



ORIËTERING MIS SY DOEL

'n Deeglike ondersoek van Die Wapad oor oriëntering het sekere feite opgelewer wat daartoe lei dat ons tot die konklusie moet kom dat of oriëntering in sy huidige vorm sy doel totaal mis of dat die mense wat dit toepas, die sisteem skade aandoen.

SIK UITGANGSPUNTE VAN ORIËNTEERERS

By navraag oor die doel van oriëntering hoor 'n mens dikwels dat dit is om groepsgees en liefde vir die koshuis (nie die PU nie) te bou. Dit is te betwyfel of hierdie metode van geesbou die regte is. Na my mening bou geforseerde swaarkry wel groepsgees - van liefde weet ek nie - maar dié gees is gedwonge en word baie afge-water sodra die druk verdwyn.

Baie senior-studente sê dat hulle oriëntering deurgegaan het en dat die nuwe eerstejaars dit nou ook maar kan doen. Kom, ons tref 'n vergelyking: my oupa het met osse geploeg, daarom koop ek nie 'n trekker nie, maar ploeg ek ook met osse! Die verlede is nie altyd 'n maatstaf vir wat reg en goed is nie, al dink die meeste bejaardes só.

Sommige seniors meen dat dit hul christelike plig is om die eerstejaars in te skakel. Hiermee stem Die Wapad saam. Die probleem is net dat die doel nie die middel heilig nie. Buitendien is dit moeilik om te sien hoe 'n eerstejaar ingeskakel kan word deur oefening te doen, uitmekaar geskree te word en sielkundig ontredder te word. En as 'n eerstejaar dan nog sê dat hy eerder uitgeskakel as ingeskakel voel, begin 'n mens wonder.

GOED EN SLEG

Hoewel daar baie goeie dinge in die huidige oriënteringsprogram ingesluit is, soos die lesings wat eerstejaars leer om te studeer, die seniorprogramaand wat hulle meer wys van die studente en die voorstel van die verskillende rade en hulle bedrywighede, is daar ook 'n paar negatiewer punte.

Nóg seniors, nóg eerstejaars weet skynbaar wat die doel van oriëntering presies is. Die vraag is hoe mense wat nie weet wat hulle met hulle doen en late wil bereik nie, dit goed en planmatig kan doen, en hoe mense iets goed kan verwerk en die beste daarvan maak as hulle nie weet waarheen hulle dryf (of gedryf word) nie.

Die onkunde wat by die meeste eerstejaars geheers het oor die aard van christelike wetenskap is ontstellend. 'n Mens sou wou hê dat dit die eerste ding is waarvoor eerstejaars georiënteer moet word - op 'n christelike universiteit. Hiervoor is 'n verwelkomingwoord van die rektor of SSR-voorsitter nie genoeg nie, maar kan juis die HK's en seniors 'n positiewe en roepingsvervullende deel bydra. Dit sou heelwat makliker wees as seniors (dié vir wie christelike wetenskap self 'n saak van erns is) toegang mog hê tot die kamers van eerstejaars tydens en ná die oriënteringsweek. Op 'n christelike universiteit is ons immers veronderstel om 'n christelike gemeenskap te bou - hoe dit moontlik is sonder om toegant te hê in die eerstejaar se kamer, bly vir my duister.

Dit moet egter genoem word dat daar wel koshuise was waar eerstejaars beter ingelig was oor dinge soos die doel van oriëntering en oor christelike wetenskap as in ander koshuise. Dit blyk dus dat oriëntering wel meer positief aangewend kan word. Ons kan net hoop dat al die koshuise hierdie voorbeeld weldra sal begin volg.

Die Wapad skaar hom dan ook aan die kant van dié seniors wat voel dat oriënteringstyd beter aangewend moet word om eerstejaars meer inligting en duidelikheid te kan gee oor die moeilike, maar baie belangrike tema van christelike wetenskap en oor die georganiseerde studente en sodat 'n eerstejaar nie eers in sy tweedejaar inskakel nie, maar somer vroeg-vroeg in sy studente-leeu.

Dat daar vanjaar geen klagtes van ouers tot die SSR gekom het nie, bewys dat ons in 'n positiewe rigting beweeg. Die ideaal is egter nog nie bereik nie. Mag ons steeds vinniger en vinniger daarheen beweeg!

VAN ONS POTE MAATJIES DRAF VANJAAR SAAM MET ONS KLAS!!



Instituut word meer bekend

Baie min studente weet van die uitstekende werk wat die Instituut vir Sielkundige en Opvoedkundige Dienste en Navor-sing op die kampus doen. Hulle is toegerus en gereed om veral studente met enige emosionele-, studie-, en beroepsprobleme te help.

'n Diens wat in 1978 ontstaan het, is 'n na-uurse spreekkamer wat deur personeel van die Psigologie en Opvoedkunde Departement beman word. Daar is meningsopnames gedoen wat die besondere behoeftes van die student peil en op grond hiervan, gaan die spreekkamer dié jaar selfs meer effektief funksioneer.

Die afdeling Psigofonologie is goed bekend aan studente in Frans

en Musiek. Die nuwe sentrum sluit onder andere ook 'n afdeling vir gehoorsopleiding van musiekstudente, 'n taallaboratorium en 'n lokaal vir kinderterapie in. Dit maak van die afdeling een van die bestoegeruste sentrums van sy soort in die land.

'n Leeslaboratorium wat lees met groter insig en begrip en leesspoedversnelling as doelstelling het, is in November 1978 voltooi. Van die waardevolle diens kan

studente reeds dié jaar teen 'n minimum koste gebruik maak.

Vir die afdeling Spraak-terapie en Remediërende Opvoedkunde is daar ook nou twee spesialiste op die gebiede aangestel.

Die hoeveelheid eerstejaars wat aansoek doen by die Instituut om toetsing, het in so 'n mate toegeneem dat die moontlikheid van 'n totale toetsing van alle eerstejaars in die vooruitsig gestel word. Gegewens sal sodoende onmiddellik beskikbaar wees indien 'n student in latere jare

vir bv. beroepsvoorligting kom aansoek doen.

Om 'n goeie idee te kry van die omvangryke werk van die Instituut, kan 'n mens gerus na die volgende syfers kyk: Aantal kliënte in 1978: 1 225 Persentasie kliënte buite

Potch: 56,8% Aantal studente in 1978: 455

Dit is merkwaardig dat die persentasie studente wat die Instituut besoek het, met 63,7% gestyg het. In die toekoms sal die getalle groter word, want die Instituut lewer eerstens diens aan die student.

Uit die Woord

Mattheus 27:46.

"My God, my God, waarom het U my verlaat?"

Hoe kan Jesus dit vra? Hy weet alles, niks is vir Hom vreemd nie. Hy ken tog sy lydensweg van stap tot stap, en ook die doel van sy lyde. Hy het geweet dat God se toorn oor Hom gekom het, ter wille van ons sondes.

In hierdie "waarom" in Jesus se mond, sien ons hoedat sy menslike natuur na vore kom. Want as Seun van die mens ondergaan Hy die swaarste lyding denkbaar. Hy is van God verlaat. Hy hang aan 'n kruis, tussen hemel en aarde. Die Godverlatenheid sien ons ook in die drie-uur duisternis wat oor die aarde gekom het.

Hy ervaar geen Vaderliefde nie. Maar alleen toorn en helse smart. Die toorn van God oor ons sondes breek ten volle oor Hom los. Hy dra die volle straf vir ons sondes.

God verlaat Hom gestel in ons plek. Hy ondergaan die lyde as ons Borg.

Sy "waarom" vind plaas in ons plek. Omdat ons God verlaat het, het ons verdien dat God ons verlaat en Hom ewig vir ons verberg. Maar in ons plek gaan Jesus die Godverlatenheid in, en roep Hy "waarom".

Hoe dikwels vra ons nie, "waarom", nie? As ons swaarkry, as ons siek is, of by die graf van 'n dierbare. Hoe dikwels is ons nie ongeduldig teenoor God in ons "waarom" nie. Onthou, in Christus is ons "waarom"

beantwoord. Die "waarom" van ewige Godverlatenheid het Hy vir ons en in ons plek gevra.

Sy "waarom" is vir ons 'n verlossingswoord. Sy "waarom" is 'n heilige, sondelose "waarom". Hy roep dit nie uit in die begin van sy lyde nie, maar aan die einde.

Jesus Christus bly aan sy Vader vashou. Hy sê: "My God, My God." Dit is geen wanhoopskreet nie, maar 'n roep in vertroue op God alleen. As Hy hierdie woorde uitroep is die verlatenheid verby. Dan skyn die lig weer en gaan Jesus die Paradys tegemoet.

Christus is verlaat sodat God ons nooit sal verlaat nie. Hy het die helse smart en angste, die donkerheid en Godverlatenheid, die gemis aan Vaderliefde deurgemaak, sodat daar vir ons ewig vreugde, lig en liefde sal wees.

God het sy eie Seun verlaat sodat ons ewig by Hom kan wees. As ons "waarom" nog aanhou, moet dit ons beskaam en bedroef. Dan moet ons ons voor God verootmoedig en om vergiffenis vra. Maar ook glo dat Christus met sy heilige, verlossende "waarom" aan die kruis ons skuld bedek het.

Dan mag ons "waarom" slegs wees in verbasing en verwondering oor God se verlossing, ook vir my. Ja, in my plek het Christus uitgeroep: "My God, My God, waarom het U my verlaat."

Redaksie 1979

HOOFREDAKTEUR: Jan Kroeze, Klooster, Tel: 3468; 22246; 22151.

ASSISTENT-REDAKTEUR: Thomas Kruger, Klooster, Tel: 3468; 22246; 22151.

NUUSREDAKTRISE: Mariëtte van der Walt, De Wetstr. 5, Tel: 5429.

INTERUNIVERSITÊRE REDAKTEUR: Vakant.

RAADSREDAKTRISE: Marlián Kritzinger, Vergeet-My-Nie, Tel: 5211; 5212.

DIEPTEARTIKELREDAKTRISE: Marianne Slot, Tomstr. 26, Tel: 23429.

DAMESBLADREDAKTRISE: Vakant.

KOSHUISREDAKTRISE: Diana Roestorf, Vergeet-My-Nie, Tel: 5211; 5212.

KUNSBADREDAKTEUR: Andre Howard, Klooster, Tel: 3468; 22246; 22151.

SPORTREDAKTEUR: Nico van der Westhuizen, Hombro, Tel: 7996; 23915.

VAALDRIEHOEKREDAKSIE: Koos Pretorius, Tel: 43915; Algerda van Dyk, Tel: 336 4356; Leon Botha, Tel: 33 7232.

FOTOREDAKTEUR: Jaco Pretorius.

TEGNIËSE REDAKTRISE: Renée Purén, Wag-'n-Bietjie, Tel: 4277; 4278.

VERSPREIDINGSREDAKTEUR: Louis van der Linde, Klooster, Tel: 3468; 22246; 22151.

OPLEIDINGSREDAKTEUR: Henning van Aswegen, Hombro, Tel: 7996; 23915.

SEKRETARESSE: Marietjie Eloff, Kulu Huisvaderswoning, PU vir CHO, Tel: 3952.

PENNINGMEESTER: De Wet du Plessis, Tomstr. 33, Tel: 7094.

SSR-LID VIR WAPAD: Anne-Marie Jacobs, Wag-'n-Bietjie, Tel: 4277; 4278.

SPOTPRENTKENAAR: Mynderd Vosloo, Caput, Tel: 22371; 3375; 3376.

REKLAMEBESTUURDER: Jacques Pienaar, Klooster, Tel: 3468; 22246; 22151.

Oriëntering in die kollig

- 'n Oorsig deur die nuusredaksie -

Oriëntering bly een van die sake wat die meeste bespreek word. Verskeie instansies loods fans ondersoek na oriëntering. Mnr. Jan-Louis du Plooy, die SSR-lid vir oriëntering, is besig om evalueringvrae-lyste op te stel.

Die Wapad het besluit om ook 'n deeglike ondersoek te loods om te bepaal of oriëntering in sy doel slaag. Die nuusredaksie het die SSR-HK-kamp bygewoon om op hoogte te kom met die oriënteringsdoelwitte van die onderskeie HK's. Tydens oriëntering is 'n ondersoek by al die koshuise geloods om te bepaal of hierdie doelwitte suksesvol bereik is.

Die redaksie sal weer later in die jaar 'n ondersoek loods om te bepaal hoe die menings van eerstejaars oor dié onderwerp verander het.

Sukses en probleme by drake

- Dirk van Heerden en Izak Minnaar -

"Ons is in werklikheid uitgeskakel by die Puk", het verskeie eerstejaar-studente tydens onderhoude oor oriëntering aan Die Wapad gesê. Ander het weer gesê hulle het die oriëntering geniet en hulle voel nou deel van die studentegemeenskap.

Daar is onduidelikheid onder die eerstejaars oor wat die doel van oriëntering presies is. Senior-studente is redelik onbewus oor die doel van oriëntering. Weinig seniors kon dieselfde antwoord gee. "Ons doen maar wat al die ander doen", was die eerlike antwoord van sommige seniors.

By een koshuis het eerstejaars gesê die doel van oriëntering is "om 'n groepsgees en liefde vir die koshuis te kweek". Hulle sê dat dieselfde doel miskien ook op 'n ander manier as die daaglikse oefeninge en geskreeuery bereik kon word.

"Die doel van oriëntering is om ons deeglik in te lig oor koshuislewe en die akademie", was die mening van eerstejaars by 'n ander manskoshuis.

Nog 'n manskoshuis se eerstejaars het gesê die doel van oriëntering is om eerstejaars by 'n nuwe lewenswyse

in te skakel: "Om opgelei te word vir die Puklewe."

Ander eerstejaars het weer gesê die doel van oriëntering is om "regte volwassenes" van hulle te maak.

By een van die groot manskoshuise het eerstejaars gesê die doel van oriëntering is om hulle deur swaarkry te leer om die koshuis lief te kry.

By sewe van die nege koshuise het eerstejaars nie geweet presies wat christelike wetenskap is nie. Verskeie kampusleiers meen dat die tyd wat aan fisiese oefeninge en 'n geskreeuery op eerstejaars bestee word, baie beter benut kan word. Sake soos wát christelike wetenskap is, behoort voorkeur te geniet. Eerstejaars kan baie beter ingelig word oor die verenigingslewe, die tradisies en verskillende prosedures van die verenigings op die kampus, het hulle gesê.

Ten spyte van die Studenteraad en HK's se gesamentlike besluit dat "tekkieparties" heeltemal verbied is, is daar tog by twee manskoshuise "tekkieparties" gehou.

Mnr. Theuns Eloff, SSR-voorsitter van die PU, het gesê dat daar hierdie jaar geen klagtes van eerstejaars of ouers ontvang is oor oriëntering nie. In die verlede was daar talle klagtes.

Verskeie seniors het gesê hulle is teen die manier waarop eerstejaar-studente georiënteer word en dat 'n daadwerklike poging aangewend moet word om hierdie saak te ondersoek. Die hele oriënteringsprogram moet weer by die christelike karakter van die Universiteit aangepas word.

Dore oor oriëntering

- Mariëtte van der Walt en Miempie Venter -

In 'n deeglike ondersoek wat die nuusredaksie van Die Wapad tydens oriëntering geloods het, is 'n aantal vrae aan al die eerstejaars van elke dameskoshuis gestel. Hierdie vrae het enersyds die kennis van eerstejaars oor aktuele kampusake, soos die betekenis van christelike wetenskap, getoets. Ander- syds is die mate waarin die huiskomitee van elke koshuis hulle doelstellings tydens oriëntering bereik het, gemeet aan die wyse waarop

hierdie doelstellings suksesvol aan die eerstejaars oorgedra is.

Die eerste vraag het gehandel oor die doel van oriëntering. Daar bestaan by baie dameskoshuise nog 'n totale wanbegrip oor die ware doel van oriëntering. Dit het selfs in sommige gevalle geblyk dat 'n primaria tevrede voel solank eerstejaars geen daadwerklike pogings aanwend om die koshuis te verlaat nie. Hieruit lei sy af dat die oriëntering in sy doel geslaag het.

Hoewel sekere aspekte van oriëntering soos sosiale inskakeling by sommige koshuise genoem is, het slegs die eerstejaars van Karlien, Dinki en Wag-'n-Bietjie 'n duidelike beeld van al die aspekte wat deur oriëntering gedek behoort te word, gehad. Hulle het ook gedink aan die waarde van akademiese oriëntering.

Die eerstejaars van Karlien en Heide het vae omskrywings van wat christelike wetenskap is, gegee. By Wanda en Vergeet-my-nie was daar telkens een eerstejaar wat ná 'n lang en vrugtelose bespreking 'n goeie omskrywing van die term kon bied. Die eerstejaars van Klaverhof en Wag-'n-Bietjie het ooglopend beter insig getoon, terwyl die heel eerste antwoord by Dinki 'n raak beskrywing van christelike wetenskap opgelewer het.

Die oriënteringsprogram van Oosterhof bevat eksplisiet die daarstelling van huislike en godsdienstige atmosfeerbeleving. Die huiskomiteede het aangebied om die vertrek te verlaat toe ons 'n

PIET 'PAD



vraag hieroor aan die eerstejaars gestel het. Hulle is gevra om te bly, maar die eerstejaars was huiwerig om hierna te reageer. Een het dit tog gewaag om te sê dat die atmosfeer "skrikkerig" is ná die atmosfeer tuis. Sy het bygevoeg dat dit "'n fees sal wees as 'ontgroening' eers verby is".

Dinki is eers in die tweede week van oriëntering besoek. Die seniors se optrede teenoor die eerstejaars was duidelik dié van onplanmatige intimidasie. Daarom

het ons gevra dat hulle die vertrek verlaat vir die duur van ons gesprek met die eerstejaars en die huiskomitee-lede. Dit was opvallend watter goeie werk die huiskomitee onder die eerstejaars gedoen het. Hulle algemene houding was positief-geïnteresseerd, en hulle het op al die vrae die mees gefundeerde antwoorde sonder huiwering verstrekk.

Hierteenoor het die houding van die seniors wat voortdurend teen die deur

gehamer het, 'n baie slegte indruk gelaat. Toe ons die gebou verlaat het, kon die stem van een van hierdie seniors presies twee straatblokke verder steeds gehoor word. Die Wapad wil dit duidelik stel dat hierdie groep seniors uit gewone dag-studente bestaan, maar ook uit mense wat voorheen vir een of meer jare in een of ander koshuis gewoon het. Daarom kan die optrede van seniors nie deur 'n maklike veralgemening verklaar word nie.



George eerder net die eerste week oriëntering wou meemaak. Hulle sê dat hulle slegs by die akademie ingelyf wil word. Uit HK-geledere word daar gedink aan spesiale kursusse om persone wat 'n jaar of langer uit die skool was, te help.

Die feit is dat dié dames alreeds 'n jaar naskoolse ondervinding het en reeds van hulle sogenaamde matriekkomplekse afstand gedoen het. Soos een dame dit gestel het: "Toe ek universiteit toe gekom het, wou ek dadelik begin studeer." Almal is dit eens dat hulle oriëntering nie soveel kon waardeer as persone wat direk uit die skool gekom het nie. Miempie.

Oop oë bepleit

Geagte Redakteur, Na aanleiding van Kort Hendrik se brief in Die Wapad van 16 Februarie 1979, net die volgende: "Ek wil graag heelhartig met u saamstem oor die onbenulligheid van 'n pas - dit verwonder my net dat daar nie meer frustrasie en onrus in die hart van die Swartman is a.g.v. optrede soos wat u beskryf nie.

Nou moet ek u ongelukkig verder bedroef - gevalle soos dié en erger (aanranding onder voorwendsel van selfverdediging) is aan die orde van die dag. Ek is egter bewus van 'n wyd uitgebreide studie op hoë akademiese vlak wat hierdie probleem tot in sy wortels sal oopkrap en 'n mens kan maar net hoop dat die owerhede die proefskrif sal lees en daadwerklik sal optree.

Aan almal vir wie dit nog nie duidelik is of tot wie die elementêre feit nog nie deurgedring het nie, Swartes is mense soos ek en jy. Kragtens watter wet,

moraliteit of christelikheid kan ons hulle dit ontsê? As hulle christene is, is hulle ons broeders en susters, en móét ons hulle lief hê. As hulle dit nie is nie, is hulle nog steeds ons naaste. Die saak verander dus nie!

Ons is christene - ons móét sover ons kan hierdie gevalle opvolg en die betrokke persoon onverskrokke betig en dan natuurlik bid dat die oë van ons mense sal oopgaan tot redding van "vreedsame naasbestaan" - as dit dan al is waarvoor daar in hierdie land gewerk moet word."

Swartman-boetie

Beroep op roepingsvervulling

Geagte Redakteur, 'n Puk is 'n mens wat by sy beginsels staan en val. Net daar waar hy begin drink het, sal hy staan tot hy val ... langs die leë bottels.

Nee wag; darem nie alle Pukke nie. 'n Groot aantal sal soos dit 'n barmhartige Samaritaan betaam anderkant toe kyk en verbystap.

Dit is snaaks dat daar ten spyte van die warm weer soveel lou mense op die kampus is. Lou "Christene" in 'n warm stryd?

Dit klink na 'n lot krasse stellings, maar hoeveel Pukke was al bereid om beginsels op te tree teen die euwels wat op die kampus hoogty vier? Ons is bang om beskou te word as verkramppte, verwaande, voor op die wa, dwepende pretbederwers en sedeprekers. Ons is skaam om ons veelgeroemde Christenskap uit te leef. In werklikheid skaam ons ons vir Christus wat bereid was om met 'n sweep onder die weekeraars in die tempel in te vlieg.

Die PU vir CHO is deur sy verlede, leuse en van onlos-

maaklik verbind aan Christus. Hoe rym dit met die groot-skaalse verdoeseling van die misbruik van drank, die talle wanpraktieke tydens oriëntering en karnaval, ontug en ydelike gebruik van Sy Naam? "Dis mos maar menslik om so 'n klein ou sonnetjie te hê," klink deesdae soos 'n reffrein in jou ore. Dit is tog opvallend hoedat hulle wat hierdie standpunt huldig, so ywerig alle ander Pukke by hulle sonnetjie probeer intrek.

Enige een kan gewild wees deur 'n "lekker kêrel" te wees, deur altyd maar met alle dinge saam te gaan en deur nooit vas te skop nie. Onthou, jou roeping as Christen is nie om vir jouself te stry nie, maar vir jou Verlosser en Salmaker wat uit liefde Sy lewe vir jou opgeoffer het. Daarom moet die stryd opofferend, meedoënloos en altyd heftig wees.

Vanjaar ... nooit ... mag jy 'n draadsitter wees nie. Jy moet optree teen bospartytjies se drank en ontug, jy mag nie swyg as 'n senior, dronk of nugter, swetsend of sarkasties vroom sy gesagsgestippelde misbruik teenoor eerstejaars nie, jy is verplig om elke onbybelse euwel op die kampus met alles tot jou beskikking te beveg. Dit is pynlik vir 'n pasiënt as sy wond ontsmet word, maar dit is tot sy voordeel.

Wees 'n voorbeeld vir ander; wees navolgingswaardig en onthou dat as jy die geloof van 'n mosterd-saadjie het, jy berge kan ver-sit.

Volg Christus altyd na en jy sal die een wees wat leiding gee en geleenthede kry om vir ander 'n voorbeeld te wees.

Wees Christene IN U LIG, en weet dat jou heerlikste taak is om Christus met ware liefde getrou te volg.

Vervul jou roeping op die PU vir CHO. Skoenmaker.

POSTE VAKANT

Die volgende poste op Die Wapad is vakant en daar kan skriftelik aansoek gedoen word. Die aansoek moet in Bussie 13 by die SSR-kantoor gepos word.

Die sluitingsdatum is 28 Februarie 1979.

NUUSREDAKSIE: drie poste vir verslaggewers.

INTERUNIVERSITÊRE REDAKSIE: redakteur, assistent-redakteur.

DAMESBLADREDAKSIE: Redaktrise, een verslaggeefster.

KOSHUISREDAKSIE: assistent-redakteur vir manskoshuise.

FOTOREDAKSIE: drie poste vir fotografe.

REKLAME EN ADVERTENSIEREDAKSIE: een tikster, vier advertensiewerwers.

RAADSREDAKSIE: ses poste vir verslaggewers.

George kwessie

Geagte Redakteur,

As oriëntering by inskakeling by die universiteit gebly het, en dit nie om die afbreek van sekere komplekse gegaan het nie, kon dit vir almal geld. Nou moet daar egter aandag geskenk word of dit regverdig is om alle historiese eerstejaars oor die selfde kam te skeer. As dit wel geregverdig is, moet akademiese eerstejaars van ander universiteite ook georiënteer word, omdat hulle ook ingeskakel moet word.

Soos oriëntering op die oomblik is, sou dames van die SA Leër Vroue Kollege op

Spektrum

1979

SPRANKELLENDE ALABAMA HET MIN FOUTE

André Howard

Die opvoering van die Alabamastudentegeselskap op Vrydag 16 Februarie was een van die bestes wat 'n mens in 'n lang tyd van hierdie groep gesien het.

Een van die min dinge wat swak was en selfs later begin irriteer het, was die onnatuurlikheid waarmee die twee vertellers hulle werk gedoen het. Die hoofdoel van die vertellers is tog om die kontinuiteit van die vertoning te handhaaf en om die sangers kans te gee om van kostuums te verwissel. Meer as dit verwag 'n mens nie van hulle nie. Veral Gerrit Schoonhoven het hom in 'n groot mate skuldig gemaak aan oorspeel. Hans van Schalkwyk, daarenteen was uitstekend as komediant en veral by die oudisie toneel het hy die gehoor telkens laat skater.

Die musikale deel van die program het begin met 'n keurspel van gewilde Kleurlingliedjies. Die musikale verwerkings was baie goed en die sangers was heel bevredigend vergeleke met die tipiese "Kleurling-klank". Soms het mens die idee gekry dat dit werklik deur Kleurlinge gesing is.

Die volgende dele van die program het bestaan uit 'n aantal liedjies van ons Engelse en ander Immigrante stamlede. In die geheel gesien was hierdie deel ook geslaagd behalwe dat 'n paar van die Duitse liedjies nie op dieselfde standaard as die ander was nie. Waaraan dit te wyte was, is moeilik om te sê, maar die musiek wou daar net nie lekker vlot nie. Die hoogtepunt van hierdie deel was beslis die vertolking van "SUMMER LOVE" uit die rolprent "GREASE". Hulle het beslis daarin geslaag om baie naby aan die oorspronklike weergawe te kom. Die enigste beswaar was dat Pieter Oberholzer se stem nie gepas het in die solo nie. Maar miskien het mens te gewoond geraak aan Travolta se weergawe.

Van solo's gepraat, oor die algemeen was dit gepas en smaakvol en veral Suzette Eloff het bewys dat sy by verre beter is as sommige sangeresses wat vandag hulle bestaan uit sang maak. Selfs Santie de Necker sou vir Sonja Herholdt 'n paar dinge kon vertel.

Na die pouse het myns insiens die geslaagde deel van die program gekom met weergawes van dele uit Ipi Tombi asook 'n paar ander liedjies van ons swart bevolking. Die orkes kon daarin slaag om die eenvoudige musiek en ritme oor te dra en saam met die aardse klank van die sangers kon 'n mens

die eenvoudige skoonheid van die soort musiek goed begryp.

Die laaste deel van die program het bestaan uit 'n aantal bekende en ook minder bekende Afrikaanse liedjies. Alhoewel die gehoor baie gehou het van sekere soos die "DIE OUKRAAL-LIEDJIE" was dit met enkele, uitsonderings nie 'n deel wat 'n mens baie lank sal onthou nie. Miskien was dit te wyte aan die feit dat dit so bekend is, maar sekere goed het hulle sprankel verloor. Uitsonderings was daar wel, soos die laaste lied op die program, "DIT IS MYNE", waar die Koperblasers baie help om 'n sterk atmosfeer te skep.

Daar is reeds vroeër melding gemaak van die sangers se klank. Toegegee, in baie van die goed het dit gepas, maar 'n mens wou soms, veral by die Engelse liedjies, 'n fyner kwaliteit hê. 'n Mens kry die indruk dat hulle streef na kwantiteit in plaas van kwaliteit. Ook diksie was nie altyd na wense nie. Die orkes het hulle egter goed van hulle taak gekwyt. Dis jammer dat sekere sangers 'n redelik ongeërgde houding op die verhoog gehad het, want die gehoor merk dit beslis op.

In alle opsigte was hierdie aanbieding beter as dié van verlede jaar. Balans tussen orkes en sangers was ook beter. In die geheel gesien het die groep beslis die staande toejuiging wat hulle op die toer gekry het, verdien.

Realistiese kuns slaag nie

'n Groot aantal skilderye is deur die JV Wilger vandeeweeke in die Totiussaal aangebied. Die uitstalling is gekenmerk deur realistiese olie- en waterwerf-schilderye van Suid-Afrikaanse kunstenaars, maar ook Persiese tapyte en beeldhouwerke is vertoon.

Die uitstalling is op Dinsdagaand 20 Februarie deur die rektor prof. Tjaart van der Walt geopen.

Mev. R. Venter wat in September verlede jaar die skilderye aan die JV beskikbaar gestel het, was weereens verantwoordelik vir die verskaffing van die kunswerke.

'n Ligpunt in hierdie jaar se uitstalling is die meer abstrakte werke van Dirk Meerkotter en die een van Irma Stern.



Alabama Studentegeselskap 1979

PU verwelkom Frankl

Minette Joubert

Peter Frankl het op 18 Februarie 'n baie geslaagde klavieruitvoering in die konservatoriumsaal gelewer. Sy program het die volgende werke ingesluit: Beethoven se 32 variasies in c mineur asook sy Waldstein-sonate op. 53. Van Schumann het hy Etudes in die vorm van vrye variasies op 'n tema van Beethoven gespeel. Vier werke van Debussy asook toegifte van Schumann, Schubert en Chopin het die program afgesluit.

LEER KUNS OM KULTUUR TE LEER

Die gebrek aan algemene kunswaardering bestaan by baie studente en daarom het mnr. John Botha van die Departement Beeldende Kunste die plan gekry om kort lesings in algemene kunswaardering en kunskritiek vir studente aan te bied.

Indien daar genoeg belangstelling is (en mens hoop dit is die geval), sal ongeveer tien lesings gereël word, waarvan een lesing aan 'n oorsig van die kuns deur die eeue bestee sal word en 'n ander lesing sal die probleem van die problematiek rondom die moderne kuns aan die orde stel. Die oorblywende lesings sal dan aandag skenk aan algemene kunswaardering.

Musiekaande word ook in die vooruitsig gestel, waartydens begeleide toere deur 'n huidige uitstalling onderneem sal word. Op hierdie manier kry die student direk met die werke self te doen, en kan baie uit die praktyk geleer word. Tydens hierdie musiekaande sal minstens een musiekwerk ook op die program wees, musiekaan-

de sal na minstens een musiekwerk geluister word en aan die hand van kenners sal dit geanaliseer en bespreek word.

'n Mens hoop dat sulke vooruitsigte 'n kultuuroplewing tot gevolg sal hê, wat moontlik op 'n kultuurklub kan uitloop.

Hierdie konsert is finansieel deur die Oude Meester Musiekstigting ondersteun.

Peter Frankl is beslis 'n meester van sy instrument en sy weergawe van die ou bekende werke was goed beplan, vars en splinternuut - ek het nou veral die twee Arabesques van Debussy in gedagte.

'n Onbekende werk naamlik Schumann se Etudes het sy debuut op die Suid-Afrikaanse konsertverhoog gemaak. Dit is 'n rare werk wat maar pas 1 en 'n half jaar in druk is. Hierdie werk is moeilik luisterbaar, vol onoorspronklike passasies waarin die tema uit Beethoven se Pastorale Sim-

fonie (stadige beweging) aanmekeer verskyn. Daar is soveel ander werke van Schumann wat eerder aan gebied kon word die konsertganger se oor meer te plesier.

Die twee werke van Beethoven was tegnies wel baie indrukwekkend, maar is heeltemal te vinnig gespeel, musikaal verantwoord te word. Die musiek self is reeds imponerend, die speler moes slegs sy tyd neem om alles met smaak na sy luisteraar oor te dra.

Frankl het egter getoon dat hy die mees ingewikkelde passasies sowel as die eenvoudigste gedeeltes met gemak kan hanteer. Sprekend was veral die drie toegifte waarmee hy elke luisteraar huis toe gestuur het met 'n indruk van die grootsheid van eenvoud in musiek.

Kunsvereniging en Universiteit bou saam aan Kunsversameling

(Met erkenning aan SA KUNSKALENDER Julie 1978)

In Potchefstroom bestaan 'n unieke versameling van ongeveer 450 hedendaagse Suid-Afrikaanse kunswerke. Die selektiewe en kontemporêre karakter daarvan het dit tot datum reeds 'n redelike bekendheid besorg. Hierdie sogenaamde Permanente en Bruikleenversameling van Kunswerke van die Potchefstroomse Universiteit vir Christelike Hoër Onderwys is nou ses jaar oud. Dit is 'n daadwerklike voorbeeld van wat tot stand gebring kan word wanneer twee instansies soos 'n universiteit en 'n kunsorganisasie saamwerk om hulle gemeenskaplike en afsonderlike doeleindes te probeer bereik.

In 1971 besluit die Departement Kunsge-skiedenis van die PU vir CHO om met die samewerking van hierdie universiteit se Departement Ontwikkeling en die Suid-Afrikaanse Kunsvereniging (Wes-Transvaal) 'n aantal uitgekose kunstenaars te besoek en om aan hulle 'n grootse groeptoestellingsgeleentheid aan te bied. Hierdie feestelike, inouguerele tentoonstelling vind in Maart 1972 plaas. Dit het dadelik tot gevolg gehad dat 'n sewentigtal skilderye, grafiese werke en beeldhouwerke van ongeveer sestig kunstenaarsvriende aan die Universiteit in bruikleen en/of permanent bewillig is.

Nie lank daarna nie is 'n spesiale vertoonlokaal vir hierdie kunsversameling bo op die Ferdinand Postma-Biblioteekgebou ingerig. Met die uitbouing van hier-

die kunsversameling word daar getrag om algemene en besondere opvoedkundige doeleindes uit te bou: Eendersyds word daar gestrewe na die daarstelling van 'n verteenwoordigende beeld van dit wat as hedendaags, goed en genotvol op Suid-Afrikaanse kunsfront gebeur. Andersyds moet dit ook as opvoedkundige kunsversameling oor bruikbare potensiaal beskik sodat die kunshistoriese student, kunsstudent en navorser die verskillende komponente daarvan kunswetenskaplik sou kon interpreteer en evalueer.

Kunstenaars soos byvoorbeeld Hardy Botha, Patrick O'Connor en Bettie Cilliers-Barnard het selfs van hulle belangrikste werke wat Suid-Afrika met internasionale biennales in die buiteland verteenwoordig het en/of pryse verower het, al-

hier in dié kunsversameling 'n tuiste gegee.

Van 'n hele aantal kunstenaars wat tot dusver by die versameling betrek is bestaan daar meer as een voorbeeld van hulle werke. Sodanige kunstenaarsvriende is byvoorbeeld Walter Battiss, Lee Brews, Mary-Rose Dold, Dirk Meerkotter, Jo Rörich, Cecily Sash, Cecil Skotnes, Hannelie van der Wat, Anna Vorster en Adele White.

In die tussentyd word hierdie kunswerke en geskrewe stukke alreeds op 'n praktiese wyse in voorgraadse- en nagraadse kolleges as visuele en teoretiese ver-wysingsmateriaal gebruik. Dit sal egter nog doeltreffender geïmplimenteer kan word wanneer die Departement Kunsge-skiedenis eersdaags 'n nagraadse diplomakursus in Kunskritiek aanbied.

G M Ballo

Poplap

SÊ 'LO ...

Sy't toe so 'n bietjie gaan rondsnuffel hierdie week en gaan hoor wat sê ander (asters en ouens) van haar - Poplap. Maar die kan jy self lees, dalk het jy ook dan iets op die hart? Vir die, skraler-as-die riet-voorkoms wat 'n móét is vir die nuwe mode met sy nouse rompe en langste splete help Poplap graag.

Net 'n klein verandering - Poplap gaan nog steeds die vroumense se sê sê, maar nou elke tweede week op 'n hele bladsy, net vir ons. Hoe klink dit vir 'n mondvol?

DRAF MAAK GESOND

1979 en gesondheid is soos vinkel en koljander- die een kan net nie sonder die ander. En die asters van die PU bly ook nie agter nie. Vroeg in die oggend en laat in die middag is dit net sweetpakke en tekkies. Dis ook reg so, want hoekom moet die eerstejaars alleen die glans en kykies kry na doretyd?

Draf is een van die beste soorte oefeninge wat daar is en gelukkig besef meeste van ons dit. Maar nie almal gun hulself hierdie gemaklike ontspanning nie. Draf is ook baie gesond. Meer en meer dokters raai hul pasiënte aan om gereeld te draf, aangesien dit 'n goeie manier is om hartkwalie en die algemene gesondheid in 'n goeie toestand te hou. Dit beteken dat behalwe die spiëre, die hart, longe en ander organe en sintuie puik moet funksioneer.

Draf het baie voordele want: dit verbeter die hele gestel en

sommer ook die voorkoms (daardie bloesende wangetjies!) Daar is geen koste aan verbonde nie - net 'n paar minute van jou tyd. Dit verbeter die bloedsomloop wat altyd noodsaaklik is om helder te dink. Dit help jou om jou oortollige gewig te verloor. Dit kan gebruik word as 'n kitskuur vir jou lastige hoofpyn of selfs 'n omgekrapte maag.

Dit is belangrik om te onthou om die regte skoene te dra. Tekkies gee die voete nie genoeg steun nie. Dis die beste om 'n paar hardloopskoene aan te skaf. Sorg dat hulle nie te knap of te wyd is nie. Hierdie skoene sal wel 'n paar rand ekstra uit die sak jaag, maar later sal geen spyt kom nie. Daar kan enige tyd met of sonder sokkies gedraf word. As jy wel sokkies dra, moet hulle van wol of katoen wees. Die groen strepe oor die tone is dus belangrik.

Dra 'n sweetpakbroek maar net wanneer dit werklik koud is. So 'n broek is hinderlik, veral as dit nat word van baie sweet. 'n Kort nylonbroekie moet eerder in die plek van 'n sweetpakbroek gedra word.

Sorg dat jy altyd bolangs so lig en koel as moontlik aange-trek is. As jou sleep of 'n goeie vriend saam gaan draf is 'n onderhemp van katoen verkieslik. Op 'n warm dag kan jy gerus met jou Pukhoedjie draf of met enige ander laphoed.

Moenie sommer dadelik die lang pad vat nie. Doen eers 'n paar opwarmingsoefeninge, veral vir die been-, maag- en armspiere. Hierdie opwarmingsoefeninge kan 'n oulike aanknopingspunt wees om "iemand" beter te leer ken, veral as hy dalk L.O. swot. Miskien draf hy ook saam.

Probeer ten minste vier keer per week draf, indien moontlik in 'n park of waar daar baie vars lug is. Minder as drie keer per week draf het nie veel waarde nie en dan mors jy net jou tyd. Vroeg in die oggend draf is beter as laat in die middag. Draf die eerste keer net 'n paar honderd meter. As jy moeg raak, loop 'n entjie en draf dan verder. Vermeerder die afstand geleidelik totdat jy 'n paar maande etlike kilometers met een drafessie kan voltooi.

Beweeg natuurlik en soos dit die gemaklikste is. Moenie 'n ander atleet se styl probeer naboots nie. Beweeg die arms gemaklik langs die sye terwyl hulle gebuig is en laat die hakke eerste die grond raak.

Moenie jousef ooreis deur rekords te probeer opstel nie, onthou Rome is nie in een dag gebou nie. Moet ook nie skielik ophou draf nie - eindig die drafessie met sootgelyke oefeninge waarmee jy opgewarm het.

Onthou dit is belangrik dat jy eers jou dokter sal spreek en sy advies sal inwin as jy aan ernstige kwale ly. Draf kan dalk die toestand vererger.

N.S. Moed hou en kop hou so tussen die vlotte, stalletjies sien jou in die "Wapad" vir 'n saam draf. Groete

sêr-oefeninge, akademie, sleep, ens. ens. ens. deur. Tot 'n volgende - hopelik meer rustige saam gesels.

POPLAP SNUFFEL

Poplap het besluit om 'n meningsopname op die kampus te doen, om sodoende vas te stel of die brief wat in die Wapad van 9 Februarie verskyn het en die damesblad so afgekraak het, gewig dra.

Die verrassende uitslag het die volgende aan die lig gebring:

By die mansgeslag is daar slegs 8% wat Poplap glad nie lees nie. Van die orige 92% wat Poplap wel lees, lees 80% Poplap slegs as daar 'n interessante artikel is, wat, volgens Gerhard Visser, voorsitter van die PU-kaners, heel dikwels gebeur. 'n Lid van die Alabama-studentegeselskap, Gerrit Schoonhoven, het aan ons gesê hy voel die damesblad van 'n studentekoerant moet iets wees wat die persoonlikheid van die besondere kampus se meisies weerspieël. 'n Meisie is volgens hom tog die fynere geslag, en as sy meer oor politiek of letterkunde wil weet, kan sy mos dergelike blaai lees.

Edmond Furter, 'n derdejaar Kommunikasiekunde-student, was van mening dat die damesblad vir dames bedoel is. Sodra daar diepte-besprekings oor politiek en ander aktuele sake bykom, is die blad dan net so geskik vir mans. Daarmee gaan die doel van die blad, naamlik om die skoner geslag oor dinge wat haar na aan die hart lê in te lig, verlore. Edmond voel dat die artikels in die damesblad van navorsing oor die spesifieke onderwerp getuig.

By die dames het ons bevind dat ongeveer 94% wel Poplap lees, 4% het haar nog nooit gelees nie en die orige 2% het gesê hulle is glad nie geïnteresseerd in 'n damesblad van enige aard nie. Die meeste dames het gevoel dat Poplap aan hulle behoeftes voldoen: artikels oor hare, parfuum, blomme en slepe is die artikels wat hulle aanstaan.

Elmarié Schutte, derdejaar Spraak- en vertolkingskunde-student, het gevoel dat Poplap maar haar sentimentaliteit 'n bietjie kan rantsoeneer. Leonie Scott, vyfdejaar-student in die regte, het gesê sy hou van die wasige foto op die agtergrond, maar dat dit lees effens bemoeilik. Sy voel dat dit Poplap 'n eie karakter gee wat haar van die res van die koerant onderskei.

Poplap se bevinding is dus dat sy tog aansien onder haar studentevriende - en vriendinne geniet, en raai die lesers wat nie van haar geartheid hou nie aan om haar dan maar liever te ignoreer.

Koshuis

Vergeet-my-nie

In Vergeet-my-nie is alles in rep en roer vir die naderende karnaval. Om dinge nog verder deurmekaar te krap vind diefstalle helder oordag plaas, onder die verbaasde oog van 'n eerstejaar. Met heelwat pret en water het ons egter die gesteelde potplant by Hombré, gang 1 gaan haal.

Die musikaliteit bly ook nie uit nie. Die enkel- en gemengde sêrgroepe laat hulle stemme deeglik geld. Die heersende woorde in die gange is die wens dat die sêrgroep van verlede jaar ons net moet hoor. Van die hoë standaard word daar nie afgewyk nie.

Party eerstejaars en seniors het twee naweke uitgeskiet en in Johannesburg en Randfontein gaan Pukkes verkoop. Al Vergeet-my-nie se Pukkies is verkoop.

Ons wil die dames van Vergeet-my-nie net herinner aan die Vergeet-my-nietjie wat later in die jaar gekies word. Karnaval is net die regte tyd om jou inisiatief te begin uitpak.

Sterkte en feeste vir karnaval aan al die Pukke!

Uitspan

Uitspan se bere het almal fris en gesond teruggekeer, en almal is lus vir die nege maande vakansie wat voorlê. Tog sal die akademie ook 'n plekkie kry.

Met karnaval voor die deur is die bere almal vol moed, veral omdat ons saam met Dinki karnaval gaan hou aanpak. 'n Paar ontsaglike aksies word saam met die dorpsdames beplan.

Die heiligdom van die Rooi Beer is ook gestraf met agt jong beertjies, wat stelselmatig besig is om hulle groeipyne af te skud. Die inburgeringsproses vorder na wense, en die beertjies is al amper mens.

Wat sleepaksies betref loop die koors hoog, en verskeie manne het gesneuwel voor die aanslae van die dore. Die "Batchelor's club" floreer egter nog met vier lede.

Daar is ook dadelik begin met ons nasionale spel, "volleyball", en daarmee saam 'n vriendelike uitnodiging aan alle dameskoshuise; ons sien kans vir julle en julle is altyd welkom om te kom speel.

Van Uitspan en sy agt-en-twintig inwoners gaan daar nog baie gehoor word in die jaar wat voorlê.

Liberalia

Die ontspanningsaal is bedompig, die vloer bedek met 'n lagie angssweet. Die seniors lyk tam en die eerstejaars totaal verslae oor wat hulle tref.

Dit kos die intelligensie van 'n genie om sewentig ouens se name, kamernommer, historiese jaar, ens, in 'n kwessie van 'n paar uur te memoriseer, en die ou manne bly hard en genade-loos.

Dit was tydens oriëntering waarin die eerstejaars bewys het dat hulle graag lede van 'n bak koshuis wil wees. Die eerste-

jaars het derde gekom op die atletiekbyeenkoms en saam met die dore van Karlien die sangbeker gewen.

Ons sien uit daarna om saam met die dames van Karlien karnaval te hou. Dankie vir die aand by die dam. Van karnaval gaan daar hierdie jaar 'n groot storie gemaak word.

Die jaar lê voor met baie uitdagings. Ons gaan skoonskip maak op alle gebiede, en dit wil gedoen word!

Klooster

Klooster 1979 is weer in volle sterkte.

Nadat die eerstejaars met 'n geselligheid as volwaardige Kloosterbewoners aanvaar is, kon dinge weer min of meer hulle normale gang gaan. Met 'n ywerige groep eerstejaars en nog yweriger groep seniors, poog almal om hierdie jaar die grootste in die geskiedenis van die koshuis te maak.

Die ding wat natuurlik op almal se lippe is, is die karnaval wat oor 'n week of wat begin. Daar was reeds geleentheid om die meisies van Klawerhof, saam met wie vanjaar vlot gebou word, beter te leer ken in 'n geslaagde aksie wat in die Kloostersaal gehou word. Menige goeie verhoudinge is opgeknap of aangeknoop en dit mag alles meehelp om die karnaval goed te laat vlot.

'n Paar manne het baie goeie akademiese prestasies in die eindeksamen gehad en hulle kan werklik daarmee geluk gewens word. Met ander het dit minder goed gegaan, maar dit lyk nie of iemand juis op moedverloor se vlakke sit nie. Alles moet egter in die stryd gewerp word sodat Klooster ook sy merk kan maak in die PU se akademie.

Kloostermanne was ook goed verteenwoordig in die PU vir CHO-Kommando wat tydens die somervakansie grensdiens verrig het. Aangesien hulle eers laat in Februarie terugverwag is, was die blydschap groot toe hulle reeds saam met die ander studente hier aangekom het. Hulle het almal veilig en ongedeerd teruggekom en almal was baie dankbaar daarvoor.

Die mense op die Wanderers het Saterdag wel deeglik kennis geneem van Klooster en Klawerhof toe daar as reklameset vir Clive Rice betoog is. Dit was so belangrik dat die nuus selfs 'n paar dagblaai gehaal het.

So gaan dit, altyd 'n bedrywige miernes by die Pikkewyne.

Kasteel

Skielik is Kasteel se dore weer die fraaiste meisies, amper soos daardie eerste dag. Daar is net een groot verskil en dit is dat elkeen na die 'verskriklike' 'regsien' Kasteel op haar hart dra.

Met dié verstandhouding en Kasteel se seniors agter hulle is daar net een doel voor oë... en dit is om Karnaval te wen! Die ander koshuise word gewaarsku dat Kasteel met interessante idees sit en is vasberade.

Kasteel is al kliphard aan die oefen vir al die verskillende items en hier gaan beslis iets aan. Ons mag nou wel nie talent hê op die sportveld nie, maar ons sal nie langer ons talente versteek nie!

Met die naderende akademie, raak ons stil, want dit gaan hierdie jaar nie agterbly nie.

Vra vir Klooster... Ons is soms tot drie uur nog wakker om te kom koffie drink!

Graag wil Kasteel se HK dankie sê vir al die heerlike aksies met die Puk-manne.

Julle sal weer van ons hoor!

Wag-'n-Bietjie wil weer so maak

Verlede jaar het Wag-'n-Bietjie se eerste hokkiespan die koshuisliga gewen en hierdie jaar is daar geen twyfel dat hulle weer met die beker gaan wegstap nie. So praat een van Wag-'n-Bietjie se uitblinkers op die hokkieveld, Hettie Oosthuizen.

Soos in die verlede het Wag-'n-Bietjie weer eens genoeg geesdriftige hokkiespeelsters om twee spanne te vul. Onder die nuwe bloed van die koshuis is daar nogal groot talent. Nie baie speelsters het Wag-'n-Bietjie se hokkie spanne verlaat nie, maar hul gaan beslis vanjaar die afwesigheid van Ilse Kühn voel. Ilse was verlede jaar seker hul beste hokkiespeelster en ook hul afrigter. Vir afrigting en hulp maak Wag-'n-Bietjie vanjaar staat op die meer ervare speelsters van die PU spanne. As gevolg van die feit dat daar vanjaar nie meer 'n PU 0/20 span sal wees nie, is daar 'n groot moontlikheid dat 'n hele paar PU- speelsters terug gaan kom na die koshuis spanne toe.

Omdat Wag-'n-Bietjie twee spanne op die veld het vanjaar, het hul geen probleme met die vind van opponente om teen te oefen nie, 'n sakie wat menige ander koshuis spanne in die verlede al hoofbrekens besorg het. Deurdat Wag-'n-Bietjie se eerste span teen die tweede span oefen, is dit vir hul moontlik om 'n puik gees op te bou, iets wat eie is aan hul hokkie dames. Ook ontvang hul net opbouende kritiek van mekaar en hou al hul tegnieke vir hulself.

Wat die komende koshuis liga wedstryde betref, is Wag-'n-Bietjie in hul pasoppens vir Karlien en baie versigtig vir Vergeet-My-Nie, twee spanne wat die paadjie na oorwinning baie moeilik vir hul gemaak het gedurende 1978.

As Wag-'n-Bietjie se hokkie dames bedoel wat hul voorspel vir die komende hokkie seisoen, kan mens seker wees van 'n jaar van goeie hokkie en sterk kompetisie van al die ander koshuis spanne se kant af.

MIN GELD VIR DIE WAPAD

Dit het onder die redaksie se aandag gekom dat daar baie probleme is om die R3 wat daar van elke student verhaal word vir Die Wapad in te samel.

Die koste van die Wapad is verhoog aangesien daar hierdie jaar elke week 'n uitgawe verskyn, papierkoste verhoog is en die werwing van advertensies in Potchefstroom 'n ietwat moeilike taak is.

Die aantal Wapaaie wat daar weekliks aan elke koshuis verskaf word, hang van die huiskomitees af. Die interne reëlings en hoe dit in die koshuis versprei word, moet die koshuise self getref word. Vir elke R3 wat deur 'n koshuis betaal word kry hy die Wapad vir 'n jaar lank.

Die Wapad sal in die vervolg slegs aan die koshuise gegee word wat hulle geld betaal het. 'n Versoek word gerig dat alle koshuise hulle gelde betaal om te verseker dat hulle hul Wapaaie elke week kry.

SO IS CLIVE RICE VERLEDE SATERDAG OP DIE WANDERERS 'DIERBAAR' DEUR DIE PUKKE BESKERM...

MYNDE



KARNAVALPROGRAM

23 Februarie:

- (1) Puk-Mielielandfietsstoer.
- (2) Standaardfietsstoer.
- (3) Gemengde Sêrkompetisie - Totiussaal.

24 Februarie:

- (1) Puk-Mielielandfietsstoer.
- (2) Standaardfietsstoer.
- (3) Motorfietswedren - op pad na Ventersdorp, net na Weermag Hoofkwartier aan die linkerkant van die pad
- (4) Enkelsêrkompetisie - Totiussaal

26 Februarie:

- (1) 21h00 Sêrfinaal - Totiussaal
- (2) 22h00 Studentevaria.

28 Februarie:

- (1) 16h30 Kaap-na-Rio (Tema: Uit Ouma se Dagboek)
- (2) 18h30 Skopfietswedren.
- (3) Blikkies vir kollekteer tydens vlotoptog word uitgedeel.

1 Maart: 18h00 Openingsaand

- Kort program, openingsspreker - Amfiteater
- Prysuitdeling (Kapitaalskatjies)
- Cowboydorp, stalletjies - Ou Puk velde
- Biertuin
- Pretpark

Laaste dag vir reklamesette. Dames Koshuise sluit 23h30.

2 Maart: Heeldag stalletjies.

(1) Mooirivierspele -

- | | |
|--------------------|--------------------|
| (a) Touklím | (e) Toutrek |
| (b) Binnebandvaart | (f) Drastoelwedren |
| (c) Kussinggevegte | (g) Donkie-July |
| (d) Wissellope | (h) Karstoot |

(2) Sewemanrugby

(3) Damessokker

(4) Dubbelpaaltjekrieket

(5) Tenniskampioenskappe

(6) Pretpark

(7) VLOTBOU

(8) Fliek in Totiussaal 23h00 DAMESKOSHUISE SLUIT 01h00

Laaste dag vir:

- (1) Inhandiging van Pukkies en geld.
- (2) Inhandiging van alle bewyse van reklamesette vir punteberekening.
- (3) T-hempies en geld inhandig.

Sportkorrèls

In 1977 ontvang hy 'n sportbeurs van die PU. Nadat hy reeds in die daaropvolgende jaar aan hierdie Universiteit ingeskryf het, lê 'n ander universiteit hom 'n omvangryker beurs voor die hand. Hy aanvaar dit. Dáár ondervind hy akademiese probleme en wend hom vanjaar tot 'n ander onderwysinstansie. Sy vorige "tuiste" lê hom hierdie keer 'n andersoortige toegewing voor die hand. Hy aanvaar dit.

Hierdie is die tragiese verhaal van geldmag, wat lank reeds aan 'n sportmonopolie koop is. Die verhaal hierbo is geen boetesering van die werklikheid nie. Hierdie soort euwels is besig om toe te neem en die hele samelewing, op alle vlakke te rysmier. Op professionele gebied gesien, is bogemelde geval nie meer 'n nuutjie nie, maar dit is 'n euwel wat nou selfs al deurkanker tot by skole. Die volle konsekwensies word óf buite rekening gelaat óf misreken. Deur dié soort brilglas verdwyn alle ander moontlike gevolge in die newel van roem en eer. Is dit dan nie 'n siek beleid nie?

- asst. sportredaktrise

KORT SPORT

SWEMGALA

Woensdag, 7 Maart, word daar 'n swemgala gehou wat deel sal uitmaak van die koshuise. Die Sportinstituut doen 'n beroep op alle koshuise in dié verband.

ATLETIEK

Nanda Barnard het verlede Woensdag haar beste hoogte van 1,71m dié seisoen in die hoogspring bereik. Die Menloparkse grasbaan was boonop nat en gevolglik baie swaar. So ook het Piet Goosen, (wat die afgelope vakansie getroud is,) 'n baie verdienstelike afstand van 55,85m met die diskus behaal. Gedurende die Sustagen-byeenkoms wat verlede Saterdag op RAU gehou is, het Leonie Smit derde geëindig in die 400m hekkies vir vroue met 'n skitterende 60,1 sekondes. Christo Botha het in dieselfde item vir mans ook 'n derde plek behaal.

FINALE RUGBYPROEWE

Volgende Maandag en Woensdag word die finale senior rugbyproewe gehou. Daar word nog na nuwe spelers gesoek. Eerskomende Saterdag is die finale proewe vir alle o/20-spelers.

RUGBYFONDS

Die PU het 'n belowende rugbybelegging in Vic de Klerk, broer van die Springbok, Kevin de Klerk, albei van Transvaal. Daar is ook sprake dat James Young by die PU gaan inskryf.

RUGBY HET PLANNE

Een van die planne is om die MATIES te verras wanneer hulle later vanjaar teen die PUKKE te staan kom in die eerste rondte van TOYOTA se nasionale klubtoernooi. Die PU is van vanjaar af baie bevoorreg om die dienste van die gewese Springbokskrumskakel, Dirk de Vos, te hê. Die eerste span sal gedurende dié seisoen deur James Stoffberg en Dirk de Vos afgerig word.

Die PU het vanjaar 'n klompie belowende spelers

Valskermklub spring 'Af'

Die PU Valskermklub het Saterdag sy eerste byeenkoms gehad by die P.C. Pelser Lughawe by Klerksdorp. 'n Stuk of twintig mans en dames het opgedaag om hulle eerste valskermssprong uit te voer.

Verlede Woensdag tydens 'n klubvergadering het die lede die eerste keer die basiese aksies geleer wat toegepas moet word voor die vliegtuig opstyg, nadat die vliegtuig verlaat is en op 2500



Eugene Naudé nader die grond vinnig tydens sy eerste sprong verlede Saterdag by die P.C. Pelser-lughawe.

voet en wanneer daar geland word. Voornemende springers word ook goed vertrouwd gemaak met die prosedure wanneer daar 'n weiering of ander storing plaasvind, maar soiets het nog nooit in die klub gebeur wanneer daar met 'n statiese lyn gesprong word nie. Die uiteindelijke doel van die valskermsspringer is om vryval te bemeester.

Dit word die eerste keer gedoen wanneer die springer reeds tien statiese lynspronge agter die rug het. Volgens die voorsitter van die klub, André Erasmus, is daar geen groter gevaar verbonde aan valskermsspring as enige ander sportsoort nie. Statische lyn beteken dat die valskerm aan die vliegtuig gehak is en wanneer daar gesprong word, gaan dit outomaties oop. Die ergste wat kan gebeur is dat die springer 'n enkel beseer met die landing en dit gebeur slegs as hy nie land soos hy geleer is nie.

Die Valskermklub het twee baie professionele afrigters, mnr. Cedric van der Vyver (wat verlede jaar so netjies met die Besembos gearriveer het) en Schalk van der Merwe. Niemand word toegelaat om in die vliegtuig te klim alvorens die instrukteur nie self seker gemaak het dat elkeen se uitrusting volledig en reg is nie.

Saterdag is ook geskiedenis gemaak toe 'n persoon wat feitlik blind is daarop aangedring het om ook te spring. Gideon Boshoff het omtrent 10 persent sig en kan

niks vanuit die lug onderskei nie. Hy moes maar staatmaak op die instruksies van die instrukteur, Schalk van der Merwe, wat saam met hom gesprong het. Gideon se kommentaar is dat dit absoluut fantasties is en hy sien uit na sy tweede sprong.

Die klub soek nog lede - mans en dames - en al vereiste wat gestel word is 'n mediese sertifikaat en toestemming vir minderjariges. 'n Aanvanklike bedrag van R25 word betaal waarvoor die lid dan die klub se toerusting kan gebruik, sy eerste sprong uitvoer asook 'n sertifikaat kry as bewys van sy eerste sprong. Daarna is die koste R6 per sprong - en dit sluit 'n vliegtuigrit van ongeveer 10 minute in!

Belangstellendes moet net die hoofkennissgewingbord dophou onder "Valskerm". Daar verskyn elke Donder-

dag 'n plakkaat met besonderhede. Name kan ook in bussies gegooi word. Die klub kom elke Saterdag voor die hoofhek byeen waarvandaan vervoer gereë word na Klerksdorp.



Attie van der Walt moes na sy eerste sprong 'n hele ent terugstap, maar was nogtans baie tevrede.

Wapadjies

Bel Jacques by 3468 (Klooster) en laat 'n boodskap.

HOU S.A. SKOON:

Die Bult-Droogskoonmakery en wassery, Uitsigarkade, reken vinnig en flink af met ghries-merke, velkolle en ander vorms van besoedeling. Kledingstukke binne slegs 80 minute droogskoongemaak. Was goed binne 'n halfdag gewas en gestryk. Ure: Maandag tot Vrydag - 7vm. tot 5.30nm, Saterdag - 8vm. tot 1nm.

KIES & KEUR:

Lyk jou kamer soos Vaalwater? Kry 'n poster by Kies & Keur! Val jou knope af, nate trek los? Naaldwerkbenodigdhede galore by Kies & Keur! Behalwe materiaal, hoede, kunsblomme en mandjies, het ons nog stapels en stapels ander goed. Vat 'n dag af en kom snuffel rond by: Kies & Keur, Tomstraat 98.

MOOI BLY?:

Kom kyk na ons groot verskeidenheid parfuum, verslankingsmiddels, proteïevoedsel en skoonheidsmiddels vir 'n jaar van skoonheid voorlê. Die Bult Apteek, Tomstraat 88B & C, Potchefstroom. Tel. 594

BLY RY EN RY BLY:

Nigrini Batterye is die naam as jy jou kar wegspringgereed wil hou sonder sweet, sonder bloeddruk en teen 40% korting, spesiaal vir PU studente lag jy heelpad bank toe op sakgeldag. Storm somer na Lombardstraat 27 vir jou battery. Tel. 7805.

STAAK DIE GESUKKEL:

Staak die gekikkel. Sê dit liever met blomme. Blomme betuig lief, inspireer, troos, sê dankie. Al wat jy moet doen is om jou gesig by 'n geleentheid te laat pas. HUIS EN TUIN het die blomme, kom soek segoed by ons. Tomstraat, Potch.

HAAI EK SÊ:

Moenie oor my kraai nie, Aia Tola, hou maar jou olie, want ek kan splinternuwe fiets by HUIS EN TUIN koop teen 10% korting, sit dit onder jou tulband om uit te broel. Tomstraat, Die Bult.

EK ADVERTEER KLEIN:

My profyt is klein - natuurlik tot u voordeel! Nuwe fietse, gebruiktes, onderdele en herstelwerk. Moenie baie sukkel nie - laat wiel na: PARK FIETSWINKEL. (F.F. Tranter). TEL. 4731, Van Riebeeckstraat 81.

VERLIEF:

Goeie nuus vir al ons aspirant-huisvroultjies. Alle Elna pryse drasties verminder. Kom kyk na die verrassing by Elwinna, Santam Deurloop, Tel. 5412.

HOOR EN SIEN VERGAAN?:

Radio- en TV-dienste het 'n wye reeks batterye vir rekenaars, horlosies, radio's of wat ook al.

Ons kitsrekenaars en Aiwa stereo audioversterkers vir motorradio's is ons trots - die beste in Potch, Lombardstraat 42.

TE KOOP:

Ampernuut, blinkblou C.B. 750 Four Honda met 'n egte km-afstand van 1 200 km en het nog sy oorspronklike 4-in-1 uitlaattyp wat die Japs aangesit het.

Hierdie zef ottie is te koop by FRANK'S MOTO X vir net R1 800. Diens en onderdele gewaarborg, Lombardstraat 13, Potch, Tel. 5723.

TIKWERK:

Enige normale privaat-tikwerk word deur Ansie Smith teen 50c per folio gedoen. Tikwerk kan in enige taal met Romeinse alfabet wees, maar moet nie breë tabelle insluit nie. Eie papier moet verskaf word. Wasvelle sal vir dieselfde prys getik word as die wasvelle self voorsien word. Goeie werk word verseker. Kontak Ansie Smith voor die einde van die maand of skakel mev. Van Biljon en laat 'n boodskap - beide by die Ferdinand Postma-biblioteek (Tel. 4239).